

焦太史編輯國朝獻徵錄

焦太史編輯國朝獻徵錄卷之七十四目錄

南京國子監

祭酒

陳敬宗

羅 琦

劉 震

蔡 清

鄒守益

管用卿

王維楨

殷 遇

司業

景 賜

馬一龍

朱大韶

李道統

監丞

陳 旅

助教

歐陽賢

典籍

李崇光

山陰張汝懋

吳興茅元儀

全校

錢塘徐象樞

刻

目錄

終

焦太史編輯國朝獻徵錄卷之七十四

朝議大夫南京國子監祭酒翰林院部右侍郎謚

文定陳公敬宗傳

黃佐

陳敬宗字光世寧波慈谿人少勵志問學取永樂甲  
申進士館閣鉅公知其俊才選入翰林爲庶吉士時  
與選者七十餘人再加精選得狀元曾棨等二十八  
人以應列宿之數讀中秘書文淵閣中敬宗與焉  
文皇帝自敬之令內府給以青緝革乳工部布几席  
揮近居與處以便宣召禮部給夜誦膏賈光祿供饌  
醜茗果食罷許出遊息仍免朝謁自是益得以沈潛

經史百氏之言 上時至間試之勗其文行期與韓  
歐並驅後先敬宗愈加磨礲奮發會大召名儒纂修  
永樂大典命敬宗等考正謬訛書成授刑部主事乃  
明習法律練達時政以宏博其器識甲午召入修五  
經四書大全繼入史館繼修 太祖高皇帝實錄卽  
進呈遂改翰林侍講嘗獻北京賦平胡頌及爲善陰  
陽頌己亥正月卿雲見甘露降獻聖德瑞應頌其年  
十一月甘露再降於孝陵松柏復爲頌以獻他如龍  
馬麒麟獅子駒虞諸福之祥畢集亦皆獻賦以揄揚  
之每元夕觀燈賜讌偕儒臣應制賦詩 上每稱善

後丁母憂宣德改元起復修兩朝實錄未及成轉南京國子司業精察積弊首疏三事上之九年秩滿陞祭酒爲人美鬚髯容儀端整步履有定則望之者起敬當會食諸生稍有失儀卽待罪不輕容也或有所稟嚴於對君之禮居常持敬以身表率每遇丁祭豫齋十日於廁房宿焉久居太學力以師道自任不少厭倦嚴立教條痛革舊習日勵諸生進學成德有違犯者扣除坐堂月日悉爲虛曠豫示而堅守之以示畏憚不敢放肆成均廟若朝廷爲戶部尚書關中楊鼎初發解於鄉試赴春官不利自北京求入南監從

南陳  
元李

敬宗卒業其爲士大夫所重如此敬宗每對客善飲  
襄城伯李隆雅重斯文或延賓罷必留敬宗再飲賓  
主至酩酊猶自儼然若未嘗飲者人皆服其量一夕  
飲過劇兀坐喧頽中人或伺之見其拳握惟謹其矜  
嚴好禮此類也平生剛平介潔勢利紛如一無所累  
評者謂其撓之不亂澄之愈清官太學二十餘年諸  
生位有至卿貳者而敬宗獨久不調意豁如也時北  
監祭酒李時勉約束諸生身教亦嚴世稱南陳北李  
景泰元年引年致仕德望文章名聞天下退而家居  
不輕出入有被接見者雍容談論莫不感發興起別

號澹然居士至是又號休藥老人云有詩文十八卷  
行於時曰澹然居士集天順三年卒年八十三

朝列大夫南京國子監祭酒羅公環墓志銘

李東陽

天順甲申廷試進士  
憲宗皇帝在諒闇制辭從簡  
集治國平天下之道爲問奉和羅公環對以爲孝乃  
萬化之原願舉此推之以成聖治上深納之賜及  
第三人與吉水彭公教太倉陸公武皆天下選也  
彭陸皆不壽以沒公獨考終於家而今亦不可作矣  
惜哉公字明仲其先有伯壽者爲元盧溝薄被旌爲  
孝子曾祖子理國初爲德安同知繼娶陳夫人卽少  
師楊文貞公嫁母也挈家戍西安文貞言於上爲

而其籍得公祖賓廉以歸公父進善從文貞夢鵠而生公額有赤誌可寸許文貞曰此鵠相也當貴且多壽公未弱冠文貞已卒讀其家所藏書文思溢發巡撫侍郎楊公寧奇之遣入縣學初仕爲翰林編修脩英宗實錄成化丁亥書成遷修撰嘗上疏言六事上優詔答之 慈懿皇太后之喪屬有異議公上疏言宜合葬 裕陵又與諸學士合章以請乃得俞命壬辰同考禮部奉命校通鑑綱目癸巳修續綱目甲午充經筵官丁酉書成擢司經洗馬戊戌 孝宗進學東宮簡侍講讀庚子主考南京凡所校閱皆精當

而是科得人尤多癸卯以母喪去丙午闋服上京師  
忽調南京禮部員外郎中外駭愕莫知其故後李孜  
省獄詞上乃知爲所中或云鄉人有弗合者構成其  
事而公不自辯也弘治初三原王公爲吏部薦爲福  
建按察副使專督學政政尚寬簡程試外恒以義理  
爲教士類悅服癸丑召爲南京國子祭酒方將大有  
施設時已沾疾猶力起治事丙辰考績京師至河西  
務疾作乃具疏乞致仕遂得請癸亥七月二十六日  
卒距其生宣德壬子壽七十二禮部爲請于朝 上  
眷公舊學特賜諭祭命有司治葬事云公端雅諒直

志識不羣博學高論動以古人爲準平居不事詭激而崇獎節義汲汲若不暇視天下事皆所欲爲中值困阨累歲再陟稍克振拔而公亦病矣爲文務簡勁詩亦脫綺靡有冰玉稿若干卷蓋其所自號因取以名其所編錄若五經旁註周易程朱異同刻于福州

朝議大夫南京國子祭酒劉公震墓碑

吳寬

南京國子監祭酒劉公卒其子翹告哀于朝公官四品於法當得諭祭而已天子知公居官得師道特命工部令有司造墳安葬蓋異數也公諱震字道亨自號勵齋世爲吉之安福人曾祖迪忠以季子安止貴贈翰林院檢討祖彝鼎隱居不仕博學工詩考德望以公貴累贈右春坊右諭德妣曠氏贈宜人公幼卽知好學生六歲其父遺從叔父德育受業出就數里外踰踰然挾書以往不以遠辭凡其父遺書訓教

藏置惟謹長入縣學爲弟子天順壬午登鄉舉及會試屢不偶人爲公淹滯惜則愈自奮發志不少衰竟擢甲科高等初授翰林編脩秩滿進侍講弘治戊申爲今上之初會國子缺司業吏部求其人不得擢公右諭德管司業事秩將滿始再擢南京祭酒蓋又五年以病卒公爲人氣剛而色毅言直而情真與人處不詭隨遇事不合於理咷然不從人有善輒稱之不善必斥之不容見朝士好進取者尤薄其爲人故公居官始終自守竟老于監官而無援之者其爲教以身率先諸生不少縱逸日課季試必嚴而公至於

歲遭歷事諸司人無敢紊其序者其居師席望其容貌若不可親然篤於恩義見寒窶者多周濟之南監廬舍歲久甚敝節縮公用修治殆徧諸生條其學政相與作詩紀之其放恣不率教者則造爲謗言以謄於外及公卒猶有作詩以辨誣者則公是有在而君子始益信其爲人之賢矣公在翰林當會試兩爲同考官廷試掌卷經筵展書皆爲盛事及初擢監官適今上視學蒙與祭酒賜坐堂上公次當講易詞義明暢上爲聳聽翌日被賜襲衣仍敕宴於禮部人以爲榮過平生文思敏略下筆數百字不蹈襲陳言

自得錄

所著有稿藏於家

中順大夫南京國子祭酒晉江虛齋蔡先生清

墓碑 林俊

虛齋棄提學按察副使歸晉江也 上起以爲國子  
祭酒居之南京命未至卒正德戊辰十二月二十三  
日也噫今亡矣先生諱清字介夫蔡出惠安東林舊  
望逮處士惠還晉江傳貢士祥傳潤傳封稽熟主事  
翁允元傳先生脊脆骨立而警悟絕人髮就總盡眉  
其師襄糧數百里從三山林憲副玭學易得其肯綮  
成化丁酉發解首又三年取進士以疾在告起爲祠  
祭主事改稽勲主事轉僉封署員外郎王安人喪既

除復主客署員外郎轉爲南京文選郎中旣乞終養  
久之卽家拜江西提學副使未幾乞致其仕疑重端  
永探養力專而進取之念故畧初友寧永貞孫九峯  
拜何椒丘願爲弟子旣又友儲殖庵楊月湖好古獨  
信貞風洞軌使人躁息妄消嘗曰吾始念一靜字旣  
又念一虛字自覺安便不費力又曰學宜養正性持  
正行聖賢言語熟復深玩則舊去新來日改而月以  
化又曰前輩何嘗不教人舉業義理充拓發由中之  
蘊櫛括以時文之式自然神采動人奚必搜奇索隱  
取難字爲工官閒無見措施而易有精詣學子請益

所至屢恒滿官所恒數百人泉之易實出指授一方  
文物之盛實始焉先生不謂無其時無其命雖未盡  
儒者之用有教人數世之澤祠先生泉人之意也先  
生天性孝友心盡而力逾勤四世之葬未慊改遷以  
爲魄之慰先晉安驛丞鄭者子先生舅之子翰以去  
舅竟神主無依先生徧求得之蕭山則鄭已有子業  
歸翰翰卒收其骨挈其妻子以還其他總功強近葬  
無歸時其衣食家室凡教人詩文自立氣格而論以  
聖勝所著易蒙引三十八卷四書蒙引四十卷河洛  
私見一卷通鑑隨筆一卷虛齋稿若干卷生景泰癸

西六月十有八日壽五十六

南京國子祭酒蔡公傳畧

蔡清飭躬砥行不愧影衾其學以六經爲正宗四書爲嫡傳未四儒爲真派生平精力盡在於此摩擬闡解學者宗之稱曰虛齋先生成化丁酉登鄉薦首榜辛丑進士授禮部主事冢宰王公恕重其學行奏改吏部主事時庶吉士鄒智謫嶺南先生以詩送之爲時所重丁母憂服闋補禮部員外陞南京吏部郎中尋乞終養正德改元朝廷卽其家拜江西提學副使旣至以德行道義教學者而時時激勸之後因執

禮忤寧麻人遂引疾致仕歸數月復以南京國子監  
祭酒起之甫命下而病終于家著有易經四書蒙引  
太極圖密箴文集世廟嗣實閱其易說亟加獎借  
特命頒行纂列姓名于理學名臣錄中先經舉入鄉  
賢繼奉賜特祀謚文莊

東廓鄒先生守益傳

王時槐

東廓鄒先生守益字謙之安福人正德六年會試中式第一廷試賜進士及第第三人授翰林編修踰年告歸一日與士人談中庸嘆曰程朱補大學格致傳而中庸乃首言慎獨不及格致何耶積疑莫釋十四年謁陽明王公於虔臺論辨反覆懇然悟曰道在是矣遂執弟子禮宸濠反從義起兵嘉靖改元錄舊臣先生始出復謁王公于越請益月餘既別王公悵望不已門人問曰何念謙之之深也公曰曾子所謂以能問於不能云云若謙之良近之矣大禮議起上疏

忤旨下詔獄謫廣德州判官復入越久之乃藩任作  
諭俗文以訓民撤淫祠建復初書院與四方來學者  
講授其中而決事發奸擿伏剖析如見猶曰如保赤  
子吾愧未之能也擢南京禮部主客郎中任滿告歸  
程太史文德量移安福令相與舉行鄉約建復古書  
院後學多所興起用薦起爲南吏部考功郎中以司  
經洗馬召上聖功圖幾得罪衆挾得免尋上薛文清  
從祀議陞太常少卿兼侍讀學士掌南院陞南國子  
祭酒以嚴立教士習爲之一變九廟炎有旨諸大臣  
自陳諸大臣皆惶恐引罪先生獨上疏慄慄於上下

文修之義至引殷中宗高宗反妖爲祥語甚急切遂落職閒住先生自以身退草野學不大行於世惟有講明道術覺人垂後爲吾儒分內事於是一以興起斯文爲已任四方學者雲集幅輶先生溫粹寬博士無賢不肖悉容納攝受隨材而牖廸之學者望其容冰玉皎潔如神明之恍臨而鄙心自消聽其言平易融徹如天籟之清響而宿蔽自擇觀其泛應曲酬慈煦惻怛出於至誠惟恐一物不得其所如春風披拂萬物然天地生生之德莫不心醉而神怡也凡得見先生卽孤介者自愧其隘執見者自覺其偏博綜者自

悔其支而負材抱奇擅長一得之士咸與然自失如涉滄溟而自知川澗之小也先生之學以萬物一體爲大以子臣弟友慥慥相顧爲實地以戒慎恐懼健行不息爲真功以寂感體用通一無二爲正學以肫肫竊竊合德天地爲極致語具在遺集中先生不立異同不設險奧百家羣議卒不能出其範圍之內而精明純一能使海宇之士聞風而嚮服蓋陽明王公之學盛於東南實賴先生力也居鄉深念細民利病如痡癥厥躬屢訕平賦省役賑饑恤患之類其事不可縷數皆達於部使郡邑罷行之皇皇如弗及邑人

沾蒙恩利愛戴不啻所生疾亟召諸子孫以篤倫戢下愛人爲訓正衣冠端默而逝年七十有二隆慶元年詔贈禮部右侍郎謚文莊蓋異數云諸子及孫登進士鄉薦者繼踵皆能世其家學云

朝列大夫南京國子監祭酒龔公用卿墓志銘

林庭機

公諱用卿字鳴治別號雲岡其先由光州固始入閩  
遂占籍焉始祖惟諫宋金紫光祿大夫高祖某贈翰  
林院檢討曾祖衍祖璲隱德弗仕父源號菊坡以公  
貴封儒林郎修撰母林氏封安人公幼慧長善屬文  
誦習經史過目不遺補邑庠弟子員嘉靖壬午以禮  
經魁薦丙戌上春官對策大廷賜進士及第第一人  
授翰林院修撰壬辰翁坡翁卒哀毀踰禮戊戌擢左  
春坊左諭德明年 上冊東宮兼官翰林院侍讀直

經筵每進講志存規諷詔修明倫大典大明會典公預焉書成兩荷金幣之賜己丑壬辰戊戌充會試同考官庚子主試南畿竝稱得士丙申奉詔使朝鮮賜一品服至則宣揚國恩力卻贍贍遠人欽服復命疏陳三事 上嘉納辛丑擢南京國子監祭酒增修學舍申飭監規一時士習爲變尋以病乞歸旣抵家卜地獨山之原構爲別墅疏池藝圃雜蒔花木日與知友觴詠其中柱史曾君佩趙君允昭後先疏薦時有忌公者陰沮其進已未倭夷寇吾福避居建安者久之未幾以微疾終年六十四公生平孝友性喜謹與

各談終日不倦歷官侍從蔚有文名其在告也時方  
競進公獨不通權貴書家食廿年竟置閑散士論惜  
之所著有使朝鮮錄雲岡選稿詩餘若干卷

南京國子監祭酒槐野王公維楨行狀

瞿景淳

公姓王氏諱維楨字允寧別號槐野陝西華州人也其先昌平州人始祖諱某者由進士任河南憲副左遷華州稅課局大使因家焉某生處士某某生真定縣令某處士某某生子六人處士某某行五也某生子二人長曰某號文菴次曰某號質菴文菴公配某氏以正德某年月日生公王氏之家華州者至公凡六世矣世以文行相後先故遂爲關中望族云公生而風骨岐峻文安公督令就學甫十歲卽善舉子業

復多博習古文辭爲文疏宕爽朗經師異之曰大王  
門者必此子也文菴公亦喜甚甫弱冠督學漁石唐  
公鳳泉王公咸以國士期之歲辛卯舉于鄉越乙未  
舉進士選授翰林院庶吉士讀書中秘三年乃授檢  
討自同館推讓公才後文安公以公貴贈徵仕郎翰  
林院檢討母某氏封爲太孺人云公傷文安公早世  
祿養不逮太孺人復以久客京邸思歸丁酉冬充冊  
使副便道奉太孺人西歸而祭文菴公墓焚黃字哀  
太孺人有女許字某生某某故仕族家稍削公特厚  
其資嫁之仍歲時餽遺不絕以順適母意又明年已

亥公留內子某孺人侍太孺人家居單直復命再閑  
時會某孺人卒公感且泣念母獨居無侍故肺疾寢  
劇具疏以請得賜歸侍養越辛丑復奉太孺人歸以  
丁未春還史館繹舊業逮己酉以九載考績乃晉秩  
爲修撰方公以盛年登朝積勞取貴可歲月計然公  
欲娛太孺人每馳回家居公誠賢者知所重固不以  
彼易此也庚戌會試復爲同考官公發策詢士畧曰  
今大同邊垣旣以底績而薊州一路頗有遺謀自今  
作之西接宣府東抵山海爲邊千二百里使幹濟之  
臣戮力經營患可少止是年秋虜果自薊州入天

子孫羣臣議特設總官大臣一人使專備薦達其議  
益自公發之冬十月會試武舉公爲主考官仰天祝  
曰是安得徇國之人而收之以裨國用攤卷品士必  
先謀議所進武弁亦多得人公燕居如觀古今名臣  
經略凡關隘阨塞備禦疎密之詳皆能歷歷指陳不  
俟按圖其用世意氣立談可知也辛亥冬詔晉秩爲  
右春坊右諭德署南京翰林院事公念南京王業根  
本控江海上游宜早戒不虞每縉紳過從輒訊兵馬  
錢穀之事人或以爲迂無何會倭奴寇下江諸郡始  
服公先議時洛陽孫公以工部尚書攝兵部事公馳

就議事卽日協同內外守備振揚兵威固守要害寇  
知有備遂遁去公謀居多甲寅夏有詔召還官坊時  
太孺人留關中便道歸省且疏請終養天子不可  
吏部移文促公還任惶懼就道旣入見復申前疏留  
中不報乙卯於命主順天府鄉試士類忻忻多自幸  
入公穀中公凡四入試場每錄出土爭傳觀謂真班  
馬之匹云時公方嚮用會太孺人遘末疾公聞報驚  
仆失聲寢食俱廢復披瀝請終養久之乃晉秩爲南  
京國子監祭酒公謝恩畢卽日陞辭倍道西馳不數  
日遇西岳爲文虔禱請以身代母太孺人聞公至病

亦少愈是年冬關中地大震山摧川溢城郭廬舍多傾毀民人壓死者過半而公亦不免實嘉靖乙卯冬十二月十三日悲夫悲夫傳稱天道無親惟與善人若公之念母人爵不廢非所謂善人耶而卒罹此景所稱天道信耶否耶豈天道閉塞賢哲將隱公故不能獨遺也公性孝友始爲諸生時喪文菴公哀毀骨立比旣貴每在告事仲父質菴恭順唯諾如事文菴公與從兄弟羣居怡怡友恭藹然人不知爲從兄弟也從姪某少孤貧公異其質資給就學撫而教之甚備今爲郡學生念族蕃有貧不能葬者割地立塋俾

以昭穆次第葬其中歲饑則出粟贍族有婚喪亦如之故族人多德公云公素剛直少不當意卽時貴必面折其過人或不堪然與人交不渝終始誠意惣至迥出俗輩里中某通判氏居官清苦夫婦沒垂三十年子不能葬公爲買地葬之其與人之周多類此故雖素不悅公者亦服公高義公雅意經世然優游館閣積二十餘年訖不當任故不及以功業自見時托之著述今有稿三十餘卷達人君子取而玩焉亦可識其微意之存也嗚呼公爲關中偉人人咸期以公輔然歷官僅四轉享年僅四十有九何去之忽也然

公文章節槩雖博千百年猶當赫赫在人則公雖死猶生矣

嘉議大夫南京禮部右侍郎管國子監祭酒事

白野殷公邁墓志銘

陸樹聲

萬曆辛巳五月南少宗伯白野殷公卒於家鄉之父老文學子弟走弔公曰是者德也以應邱典爲請之部使者疏于朝所司覆如議公諱邁字時訓南京留守衛人曾祖福祖冕並不仕父俸以公貴封承德郎南京吏部主事母錢贈安人公生而穎異氣貌淳靖甫七歲喪母哀痛數遘疾瘠若不勝衣弱冠籍諸生學日起試輒冠其曹居恒刻苦自奮勵曰學不究本原徒取世資非夫也其志已卓然矣辛卯舉于鄉及游

太學與何善山游已從南野歐陽公講聞良知之學  
以學先主靜退而屏居默識收斂視聽玩心神明於  
世味一不屑也辛丑成進士授戶部主事乞南改驗  
封滿考晉文選郎中出爲江西叅議乞休不允已擢  
貴州督學副使未上疏請致仕丁卯 穩皇帝改元  
用薦者言以原官召公視學兩浙甫至輒引疾疏格  
於監司不果上屢陞江西叅政按察使四川右布政  
遯進遜上辭久之晉南太僕卿請告還癸酉 今上  
在御復就家起公南太常卿尋陞禮部右侍郎丙子  
南大司成缺僉議非公不可強起公視職居數月復

稱疾疏一再上允致仕公自筮仕歷郎署藩臬至卿  
貳更四十年計其在官之日僅十之三前後連起公  
右職皆迫而後應論薦者以致公一出爲重始公以  
南驗封考滿如京士論屬公擬留公北銓余以語公  
公謝不欲余曰固知公不欲然士論所爲屬公者以  
此公正色曰如君者直以不行吏部知我乎公蓋自  
負若此平生嗜退每進輒引遠若不屑事至所居職  
恒辦乙卯提調江西試事稱得人視學於浙掄士一  
先德行諸生中有以出妻抵誣者獄久滯公暴其枉  
釋之夫亡而婦從死議者欲旌其節公曰婦節以守

死不貳爲貴從死非中制也議者達公在太僕值國政寢弛吏因緣爲姦公隨事振刷不辭煩細至典國學則申嚴功令開示名理六館士廩廩嚮風其臨事得大體類若此性尚玄泊恬默寡交縉紳大夫或造請公不得至海內士與公氣類者貽書不遠千里以學術相辯證居嘗掃一室默坐澄心一日窺見本體知向來情識皆緣影六塵益事窮搜以資體驗至解錬之學咸通其致每細得過從徵詰疑義引悟徹至間出之論撰皆極則之談復自謂著述非所長余嘗就閔一二冥會其指要皆主於悟明真體而融會歸

攝於養心繙性以驗之倫物故其平生嘉言懿行尤  
多世徒知公高難進易退之節而專惜獨得問學淵  
致或鮮窺其際者以余四十年交公尚知公不盡竊  
嘗妄論公坐鎮雅俗似房次徐急流勇退似錢宣靖  
洞明宗要則楊次公晁太傅至其信道之篤不言而  
默成視理學諸儒不知何如也世有知公者其以余  
爲知言公生正德七年八月十日距其卒享年七十  
始公寢疾余季太僕守南奉常日候公起居見公焚  
香趺坐有問者第舉手而已比疾革枕肱右偃而逝  
若委婉然嗚呼此公之所爲學而默成者非歟

景伯時暘行略

顧璘

景公諱暘字伯時別號前溪其先揚之儀真人父宣爲廣東市舶提舉吏目遷布政司照磨徙家金陵清溪之上遂爲上元人公生而聰警秀發五歲卽能屬對十歲業應舉文有聲布政使劉公大夏一見甚器重之曰子必爲端人不但登上第而已公至南都以易學鳴同舍之士何宗伊宇賓方宗顯相與績學見公速化深自推遜弘治乙卯顯伊賓舉應天鄉試曰伯時不舉者俟六嗣耳六嗣成豈我輩能頽頹者邪戊午公舉鄉試及試禮部不第授弟子經於儀真人

都聞學益宏博以重實去華略文貴行爲訓門人有  
異向者遣之莫不憚服正德戊辰舉進士第二人除  
翰林院編脩時經筵必越宿齋沐曰覲君之禮不敢  
不慎適逆豎劉瑾擅政陵轢文儒見公儀度端整更  
爲尊禮及教內書館嘆曰君子無棄人矧此輩爲近  
君者邪每引時事諭之於正會試爲同考試官問士  
文卷凡數夕不寐文唯縟而不復侃而不激新而不  
麗深而不刻者取之所得多佳士丙子九載考績國  
子司業缺員少師梁公謂公曰三考當爲侍讀今國  
學不可無子曷少貶以待超陟何如公曰朝廷官人

必因其材豈臣下可自擇邪唯不堪是懼耳由是遷國子司業公與六館諸生講解不憚寒暑典薄餽公廩私益以斛公知之歸其益切讓之曰吾雖貧何相賊也懼謝而去二年太孺人思歸上疏乞南補上命改左春坊左中允管南京國子司業事南方之士習競便利故多請託公一切不行士習因之一正辛巳太孺人以疾卒終喪北上道舟止儀真家人病疫公染疾竟卒春秋四十有九公生平仁孝篤至太孺人中年喪明以公能得其歡心年經八十雙日復明及承恩封里中相傳以爲異有姁姁寡奉與母俱其

子女爲之嫁娶從兄弟無不皆然門生有謁未嘗不受  
餽故舊徵文之幣亦不納爲文多宗遷固詩效唐人  
格律書法晉尤妙于篆有前溪稿若干卷顧華玉曰  
伯時自窮時與維揚火城相知交爲中允時數向余  
稱其爲人余以伯時方貴盛游者固自厚不甚入心  
比伯時卒遺孤子子門戶衰落曩時親暱人多不相  
往來獨火君顧念益勤時時遣人過江問遺踰於生  
時伯時有遺文數十卷火君捐百金梓行之曰吾不  
忍故人菁華遂殞於地火君可謂貴賤死生無替交  
態而伯時之知人未易及也

訴慕編

公字伯時雅度弘量凝然具瞻舉進士第二人入翰林爲編修文譽騰起工行書尤善小篆爲文專以意勝不尚鉤棘詩瀟散有韻直寫性情無論唐宋嘗見余少作語余白文取達意若惟以摹擬爲工按古人之跡尺寸寸務求肖似何以達吾意大蘇所謂行於其所當行止於其所當止者似不如此衆謹其言事母至孝母目盲有復明之異請養而南進中允管南司業事母卒服闋北上終於儀真公本是縣人也易簣之所卽其縣孤處人咸異之

南京國子監司業孟河馬公一龍墓志

李春芳

隆慶五年七月二十一日少司成孟河馬公卒於家  
公名一龍字負圖號孟河別號玉華子溧陽人也其  
先爲馬服君裔南海郡公訓從晉南渡遂家溧陽五  
世祖秀夫自丫髻山徙居筭橋人稱筭橋馬氏大父  
清由國子生任衛經歷碧溪公性魯正德辛未進士  
授兵科給事中歷陞尋甸軍民府知府配許孺人生  
公于河東之里以有龍祥因名龍性資穎異垂髫能  
詩讀尚書輒解聲牙語長而博綜羣籍涉獵諸子百

家詩類太白文類莊孟耻模擬前人楷柏故所作直寫胸中所自得意趣天然尤精書法作字懸腕運肘落管如飛頃刻滿幅縱橫闊闊惟意所向初覽若不可辨細玩則條理脉絡具可尋識非苟然者謂懷素以後一人碧溪公以言謫官遷尋甸有夷儼變致罹誣獄公時爲諸生卽力疾伏 閼上書情詞哀切

世廟矜而釋之尋援例入胄監嘉靖戊子中順天鄉試第一五策詳瞻海內士子爭誦之碧溪公喪公痛父冤憤而終也哀毀骨立水漿不入口幾不能生母氏多方辯解始強食居廬三年釋服屢上南宮不第

時予亦落落難合相顧笑曰我輩豈終蓬蒿人耶丁未澶淵宮洗晁公栗奇其文錄之閣臣雅重公才特破限年例改翰林院庶吉士時許太孺人春秋高乃疏乞終養歸承僕昕夕嬉嬉然若孺子母終哀毀如喪父時服闋出補國史檢討奉綸命冊封衛德二府饋遺悉却不納已未分校禮闈崇雅黜浮所拔皆知名士擢南少司成攝大司成事繩約諸生悉遵矩矯諸生不樂檢束有造飛語中公者公不爲動曰吾知盡吾職耳庸恤其他條上成均八事語多諫切時政僚友止之不果今其草具在遂疏乞休浩然長往

務本書院方山之阿日與鄉里後生講習其中窮究心性之學經年不入城市有司罕覩其面捐粟數千斛新尊經閣手書六經勒之石僉謂有功學校云建合宗祠置祭田百餘畝以供歲時享祀有餘則貯之以贍族之貧乏者嗟乎世之才高者多闊略於踐履氣豪者恒俯視乎等夷公有卓越之才負豪邁之氣少雖任放中就檢約動必遵義晚涉仕途未嘗折節權貴熏心利欲而孝親睦族又其務本之大者至於虛己受善人有一才一藝必稱服以爲不及尤人所難若公者其所謂見大立大者哉所著有玉華子

游藝集五十六卷行於世其中如天問等說庶幾達  
造化之原矣百世之下讀其書可知其人也公生弘  
治己未五月初三日享年七十有三

南司業朱文石公大韶行狀

王弘誨

公諱大韶字象玄別號文石其先自吳與徙華亭七世祖尚德公贅烏溪里家焉因爲烏溪里人尚德傳道華道華傳純庵歷山西按察副使有宦績生子六長旅溪公諱恩南京禮部尚書次橫溪公諱憲爲公父經歷南天策衛生封檢討餘山公諱良諷娶張孺人孺人孕公時經歷君夢一羽士擁從卒扶書印目君於塗曰將及而孫受之夕而公果生公生而神氣警奕目光炯炯旁射六歲從塾師誦卽習于誦一日數行下塾師驚爲之避席久之封君卒業南成均擣

公以從時張文定公爲祭酒召置門下授之儀禮數  
篇過目成誦文家大驚異何物幼小乃爾因徧見公  
于費文端諸老先生卽有聲於諸老先生封君試累  
不利公重傷父志弗成恩所以大父門者愈刻苦自  
奮癸卯以詩經魁南畿明年對公車報罷歸自砥節  
爲古文詞博聞強識學無所不窺丙午游南雍松溪  
程公以祭酒試而奇之合六館士爲文會令公司其  
雖黃悉精驗丁未登進士選庶吉士讀中秘書故事  
庶吉士選者閣臣爲遴次先後以名聞幸上俞允  
肅皇帝嘉公所咏寶善詩拔至第三人人公旣嫻於文

而又得以文自見其思雲湧川決頃刻數千言立就  
故朴張文毅公及少師存齋徐公交口稱賞爲國器  
用是感激所爲文踔絕行輩公雖操翰觚爲文人業  
乎尤留心經濟凡禮樂刑政錢穀兵戎之數俱縷縷  
口畫心計每國家有重事諸公相與議必問朱先生  
云何己酉授翰林檢討辛亥奉使冊封湘藩道維陽  
入隆中探南陽鹿門之勝事竣卽登太和浮洞庭望  
匡廬從大江過金陵三山諸名勝所紀咏著作爲多  
已歸覲二尊人稱觴爲壽里開榮之壬子冬復命還  
癸丑分校禮闈所推轂俱名士公旣用三載考績得

封父如檢討秩母爲孺人時倭寇起東南海上苦兵  
親舍越在千里外公燕居深念計不令二尊人南而  
已獨北欲以情請孫文簡公及徐公留甚力公曰官  
重親耶盜賊日暮蹣里間雖欲長侍二親詎可得耶  
遂得南司業去先是分宜相未柄國時以交驩封君  
故與公爲通家分宜子用事諸離附之者不可勝數  
公以濡足權門爲戒分宜子銜之而公又與倖臣陸  
太保有連陸貴橫甚公雖數往還非其好也陸意不  
能無小望公雅欲避之籍此自解脫世莫知云公旣  
南卽迎二親官邸供養召六館士來取約束時南都

士習侈公謂漸不可長嘗慨然曰太學故養士地今  
諸生皆誦法孔子而鮮衣怒馬六博蹴踘爲戲無有  
明於尚齒貴爵之訓者教化之謂何宜如宋祭酒訥  
故事著功令示之不宜數考問以盡其材已也議沮  
不行士論至今惜之居無何二憾果修前郤擁公旁  
有從史之者遂中公浮言解官縉紳青襟譁爲公不  
平公夷然不屑曰吾向已知之輩上君子肯爲余再  
伸志耶歸構樓於城東北隅置圖史朝夕觀覽左右  
遠眺自適取名快闊歲時行圃召听厚故人從命觴  
奕談說鄉里事爲樂絕不問門外事四方造請碑志

序記履滿戶外公投甓以應之有餘力雖居里巷中而名稱藉藉實無異朝省時公才倜儻意不可一世而勇於任事誠以待人有古君子風其事二尊人尤極孝養甘旨非先嘗不敢進誕辰必盛供具會親朋樂飲娛二親意封君捐館舍旦夕哭泣哀毀耳幾曠又病目眚終之委頓以卒公起家翰林及家居三十年祿不加盈而施日以廣骨肉之親折而不殊母及妻族無不沾公澤者其孝友篤至內行淳備益天性云公生正德丁丑十月卒萬曆丁丑五月年六十有

司業季亦卿道統傳

葉向高

昔在癸未讀中秘書者二十有八人陳州季亦卿爲第一十餘年間浮沉生死大異昔時乃近者復失亦卿情其如何因爲之傳亦卿名道統字亦卿先世昭信公自宣州徙陳昭信公四傳至贈檢討公是生亦卿亦卿少而穎七歲之母家里師問孺子知書否因採古文詩令讀讀已輒成誦授以難里師里師遜謝本氏兒未易輕也髫年故補弟子員久之乃第以庶吉士授翰林院侍講學士尋擢大學士貢力于文章乃聲詩尤工固方擇謁者踰附其門亦卿皆引與切

劉持論甚高而大指在綱川襄陽二家致亦似之以  
使事過里屬贈公漫亦卿繪及視疾至卒喪皆如禮  
再入翰林分校禮闈稱得士已晉司業蒞留雍南中  
士汰易爲邪亦卿約束甚嚴納之繩檢諸生廩廩坐  
舍中講誦不絕聲趾無敢戶窺其才者喜得師更來  
稟業文日彬彬矣先是雍士登薦善殺故額五之一  
亦卿疏復之比歲自成均舉者皆高足弟子時謂亦  
卿操士嚴亦重其倫鑒無何以疾乞歸疏三上不得  
請遂自免行至荆山卒會有詔徙北雍以左中允視  
事而亦卿不及聞矣方亦卿去時心念太夫人甚晨

夜疾馳與得一見然卒弗見也悲夫訃自白下來衆  
相與訝季君貌重而行淳庸詎止此已復相與太息  
安得風流文雅如季亦卿者亦卿善飲雅以飲自負  
登筵遙遙若不勝爵比四坐稍酣亦卿乃引滿無筭  
強客與俱客多避伏引去亦卿故自如益復浮之旁  
觀坐者君胡不自力令高陽生笑人於是亦卿酒聲  
與其詩俱噪其在吾黨惟四明王季孺蒲東楊曰泰  
稍相酬酢業皆先亦卿往亦卿默不自得去之留雍  
喜官舍稍勝有亭水竹間課士之暇輒坐飲其中且  
飲且吟後半歲以病謝客而近酒治聲律如故或謂

亦卿之詩得酒爲助其病亦十一由之廣柳歸里人  
皆哭往里中有某姓者修碑于鄰誣以拾遺金抵法  
衆共寃之亦卿白之官乃解阮孫二姓約爲婚宴不  
能就亦卿出資佐之凡亦卿之樹德于鄉多此類卒  
以見思亦卿旣沒遺稿多削僅存若干卷有子鏡能  
世其業云論曰楊子雲有云師哉師哉桐子之命也  
然而禮言嚴書言寬何相左也槩其指歸嚴則尊而  
寬則行孰能廢諸季先生與余並時而教兩雍科條  
不同要于尊道立教是在吾友余不及也夫江左六  
朝之遺也流風靡靡非吾友厚爲之坊習日愈替矣昔

司空在坐桓譚變色嚴正之移人如此故余因論季先生得教指焉

國子監監丞陳旅傳

太學志

陳旅字正初台州臨海人父燧以詩發解冠南省歷官翰林檢討按察僉事提督江西廣西學政清節粹學師表一方旅承家學以明經舉爲江西新淦縣學訓導廉以律己公以率人鄉賢有死節爲人所諱者首題其名于碑以示勸昭孺之子欲進學則力遏之暇則修治學宮規益縣政上下交誦其賢滿考書最擢翰林孔目未上以憂歸服闋改國子學錄操履一如在新新淦時雖無所事事而賢聲隱然出六館右乃遷監丞監丞職雖卑而權則重監之紀綱自祭酒

而下得參預焉旅乃首點公廨遺財力清宿弊律已  
率人益嚴而厲甚至貴戚謝過監規爲之肅然未幾  
又以憂歸起復改南京國學六館之事素聞其清強  
望而畏之曰陳豎丞來矣及署堂印遂奏請修理廟  
學盡出羨餘以資公費一無所私輸粟監生與外夷  
遺子入學者例皆厚贍旅亦一無所取顧于寮友生  
徒之孤貧患難者則周給之不吝九載秩滿卽乞休  
致諸生請于朝願再借留旅不待報已翩然東歸歸  
十載乃卒年八十有一

南助教歐陽賢墓表

楊士奇

允賢諱賢歐陽氏也仕至南京國子助教永樂壬寅十一月初三日卒於官其世家吉安泰和邑西蜀江里其先與文忠公同出吉州刺史琮其曾大父平先大父以定父觀瀾允賢洪武庚午以尚書中江西鄉試明年會試中教官選授嚴州府學教授居無幾丁內贍服闋改興化府學教授永樂元年陞國子助教其爲教授嚴條約以勵諸生一時學校爲師弟子者率棄本無實而記錄舊文以資進取徵幸得之而既懵於學術往往不見重於世允賢恒旦暮衣冠坐講

堂中取四書經傳爲諸生解析反覆使達於本原然後以其所得發爲文辭而爲定其可否在太學亦然允賢兼通詩春秋論說之際諸生非其講下者皆樂就而聽焉有疑未通者皆往質問允賢亦樂爲之傾寫蓋自祭酒司業以下咸禮重之而祭酒胡公遣子從之學太學生之始至者素已聞歐陽先生亦多願從之助教九年考最考最復職者皆援例自陳得陞衆謂允賢盍自陳曰吾常戒學者宜安命乃今自蹈耶卒不自陳於家有孝弟之行爲人坦夷直諒遇事是是非非亦喜爲人解紛排難文章取達意而止嘗

日刻深藻繪非吾所長亦非吾所願也邂逅明儕知  
已相適竟日忘返而講論道德之餘其志未嘗不在  
生民憂深思遠之意每溢出言表若聞者鮮不迂闊  
視之嗚呼豈其然哉允賢德足以惠民量足以容物  
明足以燭幾公足以爲政蓋無施而不可惜乎其止  
於此也雖承允賢之教者於爲邑爲郡爲藩不少矣  
考夫足以發其道而歷其志者固少也嗚呼允賢可  
以易得哉允賢卒時其父春秋九十有二康健無恙  
也而允賢僅五十有五其命也夫

南京國子監典籍李崇光傳

黃佐

李崇光字宗顯陝西高陵人少爲邑學生貢入太學正德庚午授南京國子監典籍事父母能色養得其歡心父疾親嘗湯藥侍卧其側晝夜不解帶旣殯猶寝苦顏色枯槁其事母疾猶事父也嘗作塋域築堵環之種樹百章羅列成行又嘗代諸兄構屋及爲典籍又以其俸貲作服其界諸兄國朝典籍書板多在南監縉紳置籍者印千紙例輸白金五分於典籍以爲常崇光辭弗受祭酒司業咸嘉之以疾卒於官